

Vijeće ministara BiH mora uputiti Zakon o narkoticima u parlamentarnu proceduru bez daljnjeg odlaganja

Visoki predstavnik Paddy Ashdown sastao se jučer u Sarajevu s profesorom Hamidom Ghodseom, predsjednikom Međunarodnog odbora za kontrolu narkotika (INCB). Glavna tema razgovora odnosila se na zabrinutost da postojeći zakoni u Bosni i Hercegovini koji za sada postoje samo na entitetskoj razini, te zastarjeli mehanizmi za kontrolu narkotika, ukazuju na činjenicu da BiH ne poštuje međunarodne standarde kontrole narkotika koje je prihvatila.

Bosna i Hercegovina do sada nije uspjela uspostaviti odgovarajuću kontrolu nad proizvodnjom aceto-anhidrida, supstance koja se koristi za proizvodnju heroina. Izvještaji o zapljeni ukazuju na činjenicu da su slabosti unutar institucija BiH zemlju pretvorili u sigurnu luku za nezakonitu trgovinu i proizvodnju droga. Zastarjeli i fragmentirani zakonski okvir koji nije primjenjiv na cijelome teritoriju BiH, te zastarjele liste međunarodno zabranjenih supstanci, samo su neki od faktora koji onemogućavaju učinkovito djelovanje tijela vlasti.

Visoki predstavnik rekao je prof. Ghodseu, međutim, da je BiH počela rješavati ovaj problem. Entitetska ministarstva zdravstva i Distrikt Brčko su kao privremenu mjeru do usvajanja nove i sveobuhvatnije liste ažurirale svoje liste narkotičnih i psihotropskih supstanci i biljaka koje čine osnovu za proizvodnju droga.

U Studiji izvedivosti Evropske komisije navodi se da BiH mora poduzeti mjere na sprječavanju nezakonitog korištenja

kemijskih prekursora i ojačati strukture za sprječavanje trgovine narkoticima.

Visoki predstavnik i predsjednik Međunarodnog odbora za kontrolu narkotika pozdravili su činjenicu da je nacrt državnog zakona o zabrani nedozvoljenih supstanci već završen. Ovaj nacrt Zakona o zabrani i suzbijanju narkotika će modernizirati bh. zakonodavstvo u ovome području i eliminirati nejednakosti između entitetskih zakona. Vijeće ministara BiH sada mora osigurati da ovaj nacrt zakona bude upućen u parlamentarnu proceduru čim se parlamentarna skupština ponovo okupi početkom rujna.

Tijela vlasti u BiH moraju ozbiljno shvatiti ovo pitanje. Većina narkotika koji se proizvode u BiH ili se izvoze iz zemlje obično završava negdje u Zapadnoj Europi, ali uživanje droga postaje ozbiljan problem i u samoj BiH. Visoki predstavnik i predsjednik Međunarodnog odbora za kontrolu narkotika gospodin Ghodse pozvali su Parlamentarnu skupštinu BiH da žurno usvoji ovaj zakon čim se ponovo okupi u rujnu.